

Zakon o visini stope zatezne kamate na neizmirena dugovanja

«Službene novine Federacije Bosne i Hercegovine»

Godina XI Broj 56 Subota, 23.10.2004.godine

Na osnovu člana IV. B. 7. a) (IV) Ustava Federacije Bosne i Hercegovine, donosim

UKAZ

O PROGLAŠENJU ZAKONA O VISINI STOPE ZATEZNE KAMATE NA NEIZMIRENA DUGOVANJA

Proglašava se Zakon o visini stope zatezne kamate na neizmirena dugovanja koji je donio Parlament Federacije BiH na sjednici Predstavničkog doma od 7. septembra 2004. godine i na sjednici Doma naroda od 2. juna 2004. godine.

Broj 01-916/04

13.oktobra 2004. godine Sarajevo

Predsjednik

Niko Lozančić, s. r.

ZAKON

O VISINI STOPE ZATEZNE KAMATE NA NEIZMIRENA DUGOVANJA

Član 1.

Ovim Zakonom propisuje se način obračuna zateznih kamata po neizmirenim dugovanjima nastalim na osnovu ugovora iz dužničko-povjerilačkih odnosa u periodu od 01.12.1989. godine do stupanja na snagu Zakona o visini stope zatezne kamate ("Službene novine Federacije BiH", br. 27/98 i 51/01).

Član 2.

Dug iz člana 1. ovoga Zakona revalorizirat će se po stopama revalorizacije koje su utvrdile Narodna banka SR Bosne i Hercegovine, Narodna banka Federacije Bosne i Hercegovine, odnosno Centralna banka Bosne i Hercegovine.

NAPOMENA: Izmjene i dopune Zakona objavljene u „Službenim novinama Federacije BiH“ br. **68/04** (strana 3.), **29/05** (strana 4.) i **48/11** (strana 6.)

Na iznos duga iz člana 1. ovoga Zakona, nastalog na osnovu dužničko-povjerilačkih odnosa na teritoriju Federacije Bosne i Hercegovine, plaća se zatezna kamata po stopi od 12% godišnje.

Zatezna kamata iz stava 2. ovoga člana neće se obračunavati za period ratnog stanja od 18.09.1991. godine do 23.11.1995. godine.

Član 3.

Obračun zateznih kamata iz člana 1. ovoga Zakona obavlja se primjenom metoda prostoga kamatnog računa za godišnje periode, a konformnog kamatnog računa za ispodgodišnji period.

Osnovica za obračun kamate je iznos osnovnog duga za prvu godinu dugovanja, a za naredne godine osnovica je iznos osnovnog duga uvećan za obračunatu neplaćenu kamatu iz prethodne godine.

Obračun zatezne kamate po pravosnažnim sudskim rješenjima obavljaju komercijelne banke kod kojih dužnik ima otvorene transakcijske račune, uz naplatu provizije.

Član 4.

Postupci za utvrđivanje visine zatezne kamate iz člana 1. ovoga Zakona koji nisu okončani do dana stupanja na snagu ovoga Zakona ili su okončani a nisu obavljani, okončat će se prema odredbama ovoga Zakona i kamatnoj stopi od 12% godišnje.

Član 5.

Ovaj Zakon stupa na snagu narednoga dana od dana objave u “Službenim novinama Federacije BiH”.

Predsjedavajući
Doma naroda Parlamenta Federacije BiH
Slavko Matić, s.r.

Predsjedavajući
Predstavničkog doma Parlamenta Federacije BiH
Muhamed Ibrahimović, s.r.

Godina XI Broj 68 Subota, 4.12.2004.godine

ISPRAVKE

Po izvršenom sravnjavanju nakon objavljivanja Zakona o visini stope zatezne kamate na neizmirenim dugovanjima ("Službene novine Federacije BiH", broj 56/04) utvrđeno je da se potkrala greška pa se na osnovu člana 188. stav 2. Poslovnika Predstavničkog doma Parlamenta Federacije BiH i člana 200. Poslovnika o radu Doma naroda Parlamenta Federacije BiH daje

ISPRAVKA

**ZAKONA O VISINI STOPE ZATEZNE KAMATE NA NEIZMIRENA DUGOVANJA
(objavljenog na bosanskom jeziku)**

Ispravljamo tekst u Zakonu o visini stope zatezne kamate na neizmirena dugovanja tako da se:

u članu 2. stav 1. brišu riječi: "koje su utvrdile Narodna banka SR Bosne i Hercegovine, Narodna banka Federacije Bosne i Hercegovine, odnosno Centralna banka Bosne i Hercegovine".

U članu 3. briše se u cjelini stav 2.

Stav 3. postaje stav 2.

Sekretar Doma naroda
Parlamenta Federacije BiH
Izmir Hadžić, s. r.

Sekretar Predstavničkog doma
Parlamenta Federacije BiH
Anto Baotić, s. r.

Godina XII Broj 29 Srijeda, 18.5.2005.godine

PARLAMENT FEDERACIJE BOSNE I HERCEGOVINE

Na osnovu člana IV.B.7. a)(IV) Ustava Federacije Bosne i Hercegovine, donosim

UKAZ

O PROGLAŠENJU ZAKONA O IZMJENAMA I DOPUNAMA ZAKONA O VISINI STOPE ZATEZNE KAMATE NA NEIZMIRENA DUGOVANJA

Proglašava se Zakon o izmjenama i dopunama Zakona o visini stope zatezne kamate na neizmirena dugovanja koji je donio Parlament Federacije BiH na sjednici Predstavničkog doma od 19. aprila 2005. godine i na sjednici Doma naroda od 2. marta 2005. godine.

Broj 01-02-180/05
11. maja 2005. godine
Sarajevo

Predsjednik
Niko Lozančić, s.r.

ZAKON

O IZMJENAMA I DOPUNAMA ZAKONA O VISINI STOPE ZATEZNE KAMATE NA NEIZMIRENA DUGOVANJA

Član 1.

U Zakonu o visini stope zatezne kamate na neizmirena dugovanja ("Službene novine Federacije BiH", br. 56/04 i 68/04) u članu 1. u drugom redu riječ "nastalim" briše se, u trećem redu iza riječi "odnosa" dodaju se riječi: "i dugovanja nastalih na osnovu naknade štete iz osnove obaveznih osiguranja", a u četvrtom redu riječi: "Zakona o visini stope zatezne kamate ("Službene novine Federacije BiH", br. 27/98 i 51/01)" zamjenjuju se riječima: "Zakona o izmjenama i dopunama Zakona o visini stope zatezne kamate ("Službene novine Federacije BiH", broj 51/01)".

Član 2.

U dosadašnjem članu 2. stav 1. briše se.

U članu 2. u stavu 3. broj "2" zamjenjuje se brojem "1".

Stavovi 2. i 3. postaju st. 1. i 2.

Član 3.

Ovaj zakon stupa na snagu narednog dana od dana objavljivanja u "Službenim novinama Federacije BiH".

Predsjedavajući
Doma naroda
Parlamenta Federacije BiH
Slavko Matić, s.r.

Predsjedavajući
Predstavničkog doma
Parlamenta Federacije BiH
Muhamed Ibrahimović, s.r.

«Službene novine Federacije Bosne i Hercegovine»

Godina XVIII Broj 48 Ponedjeljak, 1.8.2011.godine

PARLAMENT FEDERACIJE BOSNE I HERCEGOVINE

Na osnovu člana IV.B.7.a)(IV) Ustava Federacije Bosne i Hercegovine, donosim

UKAZ

O PROGLAŠENJU ZAKONA O IZMJENI ZAKONA O

VISINI STOPE ZATEZNE KAMATE NA NEIZMIRENA DUGOVANJA

Proglašava se Zakon o izmjeni Zakona o visini stope zatezne kamate na neizmirena dugovanja, kojega je usvojio Parlament Federacije Bosne i Hercegovine na sjednici Predstavničkog doma 22. juna 2011. godine i na sjednici Doma naroda 18. Jula 2011. godine.

Broj 01-02-478/11

27. jula 2011. godine

Sarajevo

Predsjednik

Živko Budimir, s. r.

ZAKON

O IZMJENI ZAKONA O VISINI STOPE ZATEZNE

KAMATE NA NEIZMIRENA DUGOVANJA

Član 1.

U Zakonu o visini stope zatezne kamate na neizmirena dugovanja ("Službene novine Federacije BiH", br. 56/04, 68/04 i 29/05), u članu 2. iza stava 2. dodaje se novi stav 3. koji glasi:

"Izuzetno od odredbi iz st. 1. i 2. ovog člana, na iznos naknade štete (glavnica) određene izvršnim ispravama (sudske presude i sudska poravnanja) i vansudska poravnanja iz osnova osiguranja definisanog Zakonom o osiguranju imovine i lica ("Službene novine Federacije BiH", br. 2/95 i 6/98) za period od 18.09.1991. godine do 23.12.1996. godine, plaća se zatezna kamata po stopi od 0,5% godišnje".

Član 2.

Ovaj zakon stupa na snagu osmog dana od dana objavljivanja u "Službenim novinama Federacije BiH".

Predsjedavajuća

Doma naroda

Parlamenta Federacije BiH

Karolina Pavlović, s. r.

Predsjedavajući

Predstavničkog doma

Parlamenta Federacije BiH

Dr. Denis Zvizdić, s. r.